

Gingjsaek Gyanghaemh Lajmbanj

乡村夜景

Sujgyaj, gou ma daengz ranzcoj lajmbanj. Haemh gyanghaemh caemdingh ndeu, vunz ndaw ranz cungj ninzdaek lo, gou cix fonj bae fonj dauq ninz mbouj ndaek. Hixnaengz, gou hwnqcong, hai aen congheung, yawj gij gingjsaek gyanghaemh lajmbanj.

Daengx aen daihdeih cungj deng mbwnlaep gyuemluemz, caemrwgrwg. Neix caeuq aensingz gou youq haenx gig mbouj doxdoengz. Youq ndawsingz, moix haemh cungj dingqny i sing heiqci yiengjhuhu, aenrwz cungj mbouj ndaej dingh roengzdaeuj gvaq.

Gou muengh hwnj gwnzmbwn bae, ndaundeiq bu rim daengx aen mbwn, lumj youq gwnz muqndaem sieng hwnj baenz naed baenz naed

cuenqsig. Gyoengqde youq ndaw gyangmbwn laeplat haenx yubyab rongh dwk, youh lumj lwgda lwgnyez gvaigvet yaep dwk. Aen ronghndwen venj youq gyangmbwn, ciuq ok gij rongh gig huzswnh. Laj go faex hung he, miz gij rongh ronghrib lingzlingz singsing yubyab mbin bae mbin dauq, sawj gij gingjsaek gyanghaemh lajmbanj dem le di saenzmaed he.

Najranz dwg aen huz iq caemdingh he, naj huz dauqdingq ingj ngauez ronghndwen caeuq gij ndaundeiq geq mbouj liux haenx, seiqmwh, mbouj rox gijmaz doxgaiq doek roengz huz bae, naj raemx sanq

ok baenz gvaengx baengz gvaengx gienluenz, gyaux soiq aenngaeuz ronghndwen caeuq ndaundeiq ndaw raemx.

Gaenhlaenz miz diuz rij iq he, sing raemx laecoco caeuq sing duzbid hemq yungzhab youq itheij, gap baenz diuz go ndaw daswyenz ndeidingq he.

Youq giz mbouj gyaem miz benq ndoengfaex faexyehswj he, rongh ronghndwen ndonj gvaq geh mbawfaex, gij rongh ronghndwen couh baenz gij ngauez vaihlik vaihlak lo, ciuq youq gwnz dieg, lumjbaenz fuk vehcouhsienq nei. Rumziq yaengyaeng ci dwk mbawfaex, mbawfaex riengz



rumz bibuengq, mbawfaex caeuq mbawfaex doxbungq, fat ok sing iq yiengj “caca”.

Gingjsaek gyanghaemh lajmbanj geijlai gyaundeih ha, hojsik, seizhaenx gingqyienz doek fwnhung lo, gou gipmuengz gven congheung. Mbouj rox seizlawz, gou youq ndaw sing fwn ninzdaek lo……

(Vungh Veijginh)



Fwn

雨

Ngoenz he banngaiz, mbwn bumz-fubfub, seiqmwh, miz geij ndik fwn doek youq gwnz naj gou, liengzsis. Ciepdkw, fwnmboenq doek roengzdaeuj. Gij fwnmboenq lumj bwn duzyiengz nei, saeq lumj diuzmae, doek ndaej yied dauj yied gip, deihdeih dedded san baenz aen muengx hung he. Fwnmboenq doek youq gwnz mbawfaex, mbawfaex engq heu lo. Fwnmboenq doek youq gwn dipva, lumj hawj dipva sieng hwnj rinbauj gak saek gak yiengh.

Youh gvaq yaep he, fwn yied doek yied hung, daihdeih cungj bienq yiengh lo. Fwnhung “vava” ciengq go dwk, gig vaiq couh dumh gaiqlh lo. Gwnz loh heiqci caeuq cidienhdoengh baebae dauqdaug, lumj gyoengq nengzgoemj caeuq gyoengq moed nei laebluenq seiqlengq deuz bae. Bakcongheung, raemxfwn gienj baenz aen baenz aen vanlouh, geij mbaw mbawfaex gapbaenz aen gendui he youq ndaw vanlouh swnh rumz buq langh.

Banhaemh, fwn ciemhciemh dingz lo. Gou byaij ok ranz bae, hoengheiq baihrog gig singjsien, caen cwxcaih ha!

(seiq nienzgaep Lij Swjmingz)

Daxboh Gujli Gou “Baihgya”

爸爸鼓励我“败家”

Gou daj iq couh gig diuqbeiz, doiq gijmaz cungj gig geizheih. Cijaeu yawjraen doxgaiq moq, gou couh maij dawz de cek dwk lukluk liklik. Daxmeh cungj dwg heuh gou “lwg baihgya”, hoeng daxboh cix mbouj doengz, de cungj dwg gujli gou “baihgya”.

Geiq ndaej miz baez ndeu, gou yungh lozswhdauh caeuq fagcuiz cek aen suj moq ndeu vaih lo, gwnz dieg cungj dwg gij lingzgen gou cek okdaeuj haenx. Daxmeh yawjraen le, vix aen-gyaem gou ndaq naeuz: “Lwg baihgya neix, yawj mwngz guh gij saeh ndei, gou yawj daxboh mwngz dauqma baenzlawz sousib mwngz.” Gou gag rox gou mbouj deng, lauxlaux saedsaed naengh youq gungxgox caj daxboh dauqma. Gvaq yaep ndeu, daxboh

dauqma lo, daxmeh sikhaek gauq naeuz: “Yawj daeglwg guh gij saeh ndei neix, caen dwg boux ‘lwg byaihgya’!” Daxboh cix mbouj hozndat saekdi, bekbek aenmbaq gou, riu dwk naeuz: “Mbouj youqgaenj law, daeglwg, mwngz cek ndaej roengzdaeuj, gou siengsaenq mwngz itdingh hix dawz de dauq cang ndei bae. Daeuj, mwngz dawz gij lingzgen gip hwnjdaeuj gonq, caiq siengj banhfap dauq cang ndei.” Youq daxboh gujli caeuq bang lajde, gou hainduj doengh uk, gaem hwnj hongdawz, menhmenh dauq cang ndei aensuj lo. Cang ndei mbat haenx, gou mbouj rox geijlai angq ha. Doeklaeng, gou youh cek vaih haujlai doxgaiq iq ndaw ranz.

Gingciengz miz vunz haenx

gou coengmingz, bonjsaeh doenghfwngz ak, daxboh dingq le riu naeuz: “Neix cungj dwg gou gujli de ‘baihgya’ cij bienq coengmingz ha!”

(seiq nienzgaep Lij Fazbinh)



Nonsei Caeuq Duzmoed Doxhoenx



蚕蚁之战

Miz ngoenz ndeu banhaet, gou youq laj gofaex najranz guhcaemz, sawqmwh yawjraen duz nonsei he mbouj dingz ringx bae ringx dauq. Gou byaij gyawj yawj, laxlawz dwg duz nonsei neix cingq deng duzmoed iq ndeu mboujdingz haeb dwk. Gou gag siengj: “Duz moed iq neix caen dwg ra dai lo. Nonsei baenzneix hung, duzmoed baenzneix iq, baenzlawz ndaej hoenx hingz nonsei ne?”

Gou daiq aen ngeizvaeg neix sijsaeq yawj. Mbouj yaep he, duz

moed neix raih bae lo. Gou laihnaeuz dwg duzmoed rox nanz gag doiq bae lo, hoeng gij cingzgingj hawj gou siengj mbouj daengz haenx yienh youq baihnaj gou. Duzmoed heuh gyoengq gouqbing he dauj doiqfouq duz nonsei hung neix, gyoengq moed geq mbouj liux haenx dawz nonsei humx dwk, mboujlnh nonsei baenzlawz ringx, gyoengq moed iq cungj itcig haeb duz nonsei mbouj soeng bak. Doeklaeng, duz nonseiz neix deng gyoengq moed iq haeb dai, duzmoed hoenx hingz nonsei lo.

Seizhaenx gou youh gig roxnyinh geizheih, duzmoed haeb dai nonsei le baenzlawz daeh ma

ndaw rongzmoed ne? Yienghneix gou laebdaeb dinghdinh yawj gyoengq moed neix. Cij raen gyoengq moed iq miz mbangj bin daengz gwnz ndang nonsei bae, miz mbangj ndonj daengz laj ndang nonsei bae, miz mbangj youq baihnaj rag, miz mbangj youq baihlaeng nyoengx, baen-goeng cingcuj, boiqhab gig ndei, doeklaeng rag nonsei haeuj ndaw rongz bae lo.

Neix caen dwg ciengz nonsei caeuq duzmoed doxhoenx haenq he ha! Duzmoed iqet gingqyienz baenzneix doxgiet, gyoengqde yungh gij cingsaenz doxgiet caez guh hoenx hingz gunnanz, aeu-ndaej hingz. Danghnaeuz raeuz hix lumj duzmoed yienghneix doxgiet caez guh, lij miz gijmaz vwndiz gaijgez mbouj ndaej ne?

(haj nienzgaep Ginh Can)